

Յ. ՍՊԷՆԴԻԱՆԻ ՃԱՌԸ

(Սրտատանգած հսկա. 13-ին ներսիսեան գպրոցում)

Ես յանձնարարութիւն ունեմ «Մշակ»
լրագրի կողմից ողջունել այսօրվայ մեծ
ազգային տօնական հանդէսը:

Հայ գրերի գիւտը և հայկական տպագ-
րութիւնը վերջնականապէս որոշեցին հայ
ցեղի լինել թէ չը լինելը լուսաւորված ազ-
գերի շարքում:

Այդ երկու նշանաւոր պատմական մօ-
մենտները հանդիսացան հայ ազգի կեանքի
մէջ իբրև երկու հսկայ լուսատու ֆահեր,
որոնք զարթեցրին խաւարի և տգիտութեան
մէջ ընկղմած հայի միտքն ու գիտակցու-
թիւնը, արթնացրին նրա մէջ թմրած մտա-
ւոր ոյժերը, ցոյց տալով ժողովրդին բա-
րոյապէս և մտաւորապէս զարգանալու ու
անելու ուղիղ ճանապարհը:

Հայ գրերի գիւտը տուեց մեզ հայ մա-
տենագիրների մի փայլուն շարք, որոնց
գործերը մինչև այսօր գրաւում են գիտ-
նականների ուշքն ու միտքը:

Այդ իր նշանակութեամբ եզակի գիւտը
ստեղծեց հայ գիտութեան և գրական շարժ-
ման ոսկեդար, որը հարստացրեց մեր
պատմական մատենագրութիւնը նշանաւոր
երկերով, նուիրված հայ ազգի պատմական
անցեալի ճշգրիտ լուսարանութեան: Հայոց
վանքերում, որոնք հնում լուսաւորութեան
կենտրոններ էին, իսկ վանականները ու-
սումնականներ, սկսվեց մտաւոր եռուն
կեանք, հիմնվեցին դպրոցներ գրագիտու-
թիւնը ժողովրդի մէջ տարածելու համար:

Բայց և այնպէս հայ գիրը, հայ մտքի
ստեղծագործութիւնը մատչելի էր միայն
այն ժամանակվայ մտաւորականութեան նեղ
շրջանին, իսկ ժողովուրդը իր ամբողջու-
թեամբ մնաց զուրկ Հզրագիտութիւնից. և
ահա հայ տպագրութեան գիւտը եկաւ լրաց-
նելու այդ մեծ պակասը: Այդ մօմենտից
սկսած՝ հայ գիրը ստացաւ լայն շրջանառու-
թիւն ժողովրդի ստուար խաւերում և դար-
ձաւ ազգային լուսաւորութեան, նրա մտքի
զարգացման խոշոր գործօններից մէկը, որը
մինչև այսօր շարունակում է կատարել իր
վեհ պաշտօնը: